

元秘史李注補正

元祕史李注補正卷十四

秀水高寶銓

阿兒不合地面

一統志省鬼山在鄂爾多斯右翼中旗西北二百二十里又名阿羅布坦山寰宇通志山踰黃河因省鬼城而名黃河東有省寇口爲防禦要地其下有城西夏所築又曰黃河北流逕古朔方之西行五百餘里一支分爲二歧東注水經所謂南河也其北河流至套外之阿爾布坦山南迤西溢爲大湖土名騰格里腦兒卽古屠申澤也自此屈而東流逕古高闕施元杰曰阿兒不合卽今阿爾布坦對音是也

棚幹兒合惕地面

一統志鄂爾多斯左翼後旗駐河套東北西北至綽和爾末里圖烏喇忒界三百七十里施元杰曰捌斡兒合惕卽今綽和爾末里圖之對音是也

西涼

今甘肅省涼州府

在雪山住夏

一統志甘州府張掖縣南有雪山

賞孛斡兒出木合黎財物

木華黎薨於太祖十八年此財物蓋以賞其子而仍云木合黎者推所自也前文卷十二旣收禿馬惕後賞與了孛羅兀勒一百禿馬惕的百姓孛羅兀勒征禿馬惕被殺而曰賞與

字羅兀勒是其例矣原注云云非也

### 兀刺孩城

施元杰曰兀刺孩卽阿喇克鄂拉之對音今一名龍首山乾隆時兵部督捕理事官拉都琥奏言龍頭山蒙古謂之阿拉克鄂拉乃甘州城東北大山脈繇延邊境山口卽邊關建夏口城距湟川堡五里山盡爲甯遠堡距龍首山里許有昌甯湖界之一統志龍首山在厄魯特旗西南與甘州府山丹縣接界蒙古名阿喇克鄂拉縣亘廣遠東大山之脈絡也距甘州城三十里山丹城三里據此知元太祖由今張掖縣起程東攻靈州須踰此山銓案今山口卽邊關建夏口城疑兀刺孩城卽在其處

靈州

今靈州所西北至甯夏府九十里靈州故城在西南

皆以九九爲數

國朝崇德三年詔喀爾喀歲貢白駝一白馬八謂之九白之貢

至豬兒年成吉思崩後

本紀二十二年丁亥夏六月帝次清水縣西江秋七月壬午不豫巳丑崩於薩里川哈老徒之行宮蒙古源流曰青吉思汗以丁亥七月十二日歿於圖爾墨格依城案太祖六月次清水以七月崩當卽崩於清水水道提綱曰黃河至甯夏中衛東北鳴沙堡西折而北流有清水河南自固原州北流合

諸水來注之是也其地曰達蘭達葩其水一曰也只里河元史察罕傳曰北遷清水荅蘭荅八之地荅蘭荅八者卽太宗紀六年夏五月帝在達蘭達葩之地大會諸王百僚諭條令秋七月帝在八里里荅蘭荅八之地議自將伐宋定宗紀太宗崩皇后臨朝會諸王百官於達蘭達葩之地遂議立帝者也而速不台傳曰壬寅太宗崩癸卯諸王大會拔都欲不往速不台曰大王於族屬爲兄安得不往甲辰遂會於也只里河丙午定宗卽位中衛地元爲應理州耶律希亮傳作應吉里也只里又應吉里音轉清水經中衛入黃故又曰也只里河矣又定宗紀丙午秋七月卽皇帝位於汪吉宿滅禿里之地郝和尚拔都傳曰甲辰朝定宗於宿魯都之行宮汪吉蓋

卽應吉音轉宿滅禿與宿食都對音則薩里川卽甯夏中衛之地哈老徒行宮卽宿食都行宮矣又張穆蒙古游牧記曰鄂爾多斯盟名伊克昭蒙古謂大曰伊克廟曰昭夫此大廟之名曷起乎理藩院則例載伊克昭境內有青吉斯汗園寢鄂爾多斯七旗向設有看守園寢承辦祭祀之達爾哈特五百戶每年共出銀五百兩以供祭祀修理之用於該盟內奏派賢能札薩克一員專司經理然則伊克昭之名爲因青吉斯汗園寢得名矣而園寢所在無的處史稱元世諸帝自太祖以下皆葬起輦谷起輦谷何在於各家撰述亦無徵也案蒙古源流卷四載青吉思汗於丁亥七月十二日歿於圖爾默格依城於是以輦奉柩至所卜久安之地因不能請出金

身遂造長陵其仰庇護於彼處立白屋八間在阿勒坦山陰  
哈岱山陽之大謬特克地方建立陵寢號爲索多博克達大  
明青吉斯汗自後元裔之襲汗號者率卽位於八白室前卷  
六載達延汗降旨云鄂爾多斯者乃爲汗守禦八白室之人  
屬大有福者阿勒坦山卽此右翼中旗西北之阿爾布坦山  
康熙圖載阿爾坦山在河套外騰格里泊西北五十里許與  
喀爾喀接界是善巴再從弟丹津額爾德尼之祖畢瑪哩吉  
哩諦牧地也方畧康熙十九年噶爾丹屬私掠內札薩克烏  
喇特部界畢瑪哩吉哩諦以所居哈魯特山距烏喇特六日  
程慮還掠詔設汛防禦一統志稱丹津額爾德尼駐牧地北  
至阿爾泰山陰然則哈岱山卽畢瑪哩吉哩諦所居之哈魯



特山矣又土默特德貝子號知蒙古掌故徐君松述其語曰  
元太祖葬地在榆林邊外極西北地名察罕額爾格察罕白  
額爾格帳房也貝子此語與八白室義合然則額爾格卽諤  
特克譯字之變大諤特克地方卽史所稱起輦谷其地在今  
賽因諾顏左翼右旗與諤爾多斯右翼中旗兩界之交無疑  
也又葉子奇草木子曰歷代送終之禮元朝宮裏用椁木二  
片鑿空其中類人形大小合爲棺置遺體其中加髹漆畢則  
以黃金爲圈三圈定送至其直北圍寢之地深埋之國制不  
起墳壟葬畢以萬騎蹂之使平殺駱駝于其上以千騎守之  
來歲春草旣生則移帳去彌望平衍人莫知也欲祭時則以  
所殺駱駝之母爲導視其躑躅悲鳴之處則知葬所矣故易

世之久子孫亦不能識也而世遂說以元陵爲歸化城而北  
祁連山中張文端漠北日記曰出歸化城行九里入祁連山  
此山亦名祁連非甘伊以西之祁連也遠望石峯疊翠入其  
中則平阜蜿蜒相傳元世帝后俱潛厝此山而不立陵墓云  
云徐蘭謁元世祖陵詩注陵無封樹獵者或踐其地輒有風  
雷之異詩云聞昔朱明修祀典曾命禮臣巡禹甸伏羲下逮  
宋理宗三十六陵皆祭遍祁連因未入提封欲齋香帛無由  
從掃階席屋順天府春秋遙望青芙蓉芙蓉青青亂雲宿中  
有三間老瓦屋征人遙望綠琉璃知是元家起輦谷沿誤與  
文端同至龔之鎬後出塞錄稱起輦谷在房山縣又因順天  
府望祭之設而誤也

鼠兒年

戊子歲本紀曰是年拖雷監國

右手大王察阿歹巴禿

察阿歹卽察合台太祖次子巴禿卽拔都朮赤長子太祖長孫也察合台封於西域朮赤封於歐洲先太祖卒拔都嗣皆在西方故曰右手

左手大王斡赤斤

太祖諸弟分地皆在東方元史特薛禪傳曰歲甲戌太祖分賜農土曰苦烈兒溫都兒斤以與按陳及哈撒兒爲農土又諭按陳曰可木兒溫都兒答兒腦兒迭蔑可兒地汝則居之旣以苦烈兒溫都兒分賜按陳及哈撒兒而按陳得溫都兒

則哈撒兒得苦烈兒可知苦烈兒河名特薛禪傳又作龜刺  
兒土土哈傳作貴烈伯帖木兒傳作貴烈兒乞台傳作魁烈  
兒今日歸喇里河亦曰桂勒爾河源出今內蒙古科爾沁右  
翼中旗西北東流經其旗北又東經其前旗北合於陀刺河  
陀刺河又東至郭爾羅斯旗界入於嫩江水道提綱曰歸勒  
里河卽貴勒爾河源出索約兒雞山之東南百里東麓東北  
流百數十里經魁勒庫山之北茶蒲乞拉庫哈達之南又東  
稍北折而東南曲曲三百里與北來之拖兒河會是也哈撒  
兒分地在此河之間則今科爾沁旗境及其迤東北之地也  
土土哈傳乃顏叛陰結也不干勝刺哈有旨令勝刺合入朝  
將由東道土土哈言於北安王曰彼分地在東脫有不虞是

縱虎入山林也玉昔帖木兒傳哈丹禿魯干復叛玉昔帖木兒倍道過黑龍江擣其巢穴夷其地撫其民而還哈丹者哈赤溫之孫勝納哈者哈丹之孫也土土哈以勝納哈分地在東不欲其由東道而玉昔帖木兒過黑龍江擣哈丹巢穴是哈赤溫分地在黑龍江也撒吉思傳初爲太祖弟幹眞必闌赤領王傳幹眞薨嫡孫塔察兒襲撒吉思與火魯和孫分治黑山以南撒吉思理之其北火魯和孫理之撒吉思與火魯和孫所治者幹眞封地也黑山卽哈刺溫山今曰巴顏烏喇山在克魯倫河北當河之曲山之南北卽河之南北則今克魯倫河巴顏烏喇山南北跨河兩岸乃鐵木哥幹赤斤分地也別里古台傳曰以幹難怯魯之地建營以居近太祖行在

所南接按只台營地幹難今敖嫩河怯魯今克魯倫河大祖  
發祥之地也按只台特幹禪傳作按赤台卽按陳也則別里  
古台分地敖嫩克魯倫兩河之間南距按陳所受封域西接  
幹赤斤界也

幹豁禿兒蒙格禿

元史憲宗紀三年命諸王旭烈兀及兀良哈台等帥師征西  
域哈里發八哈塔等國又命塔塔兒帶撒里土魯花等征欣  
都思怯失迷兒等國撒里土魯花似卽此幹豁禿兒兀良哈  
台似卽此蒙格禿

做後援征去

案所謂後援只是繼續前事非濟師之謂

十一種城池百姓

元槩本曰康鄰曰乞卜察兒惕曰巴只吉惕曰幹魯速惕曰

阿速惕曰辭速惕

卽前文撒速

曰馬札兒惕曰客失迷兒惕曰辭

兒格速惕曰不合兒

卽前文李刺兒

曰客列勒

卽前文刺刺勒

曾命速別額台征進去了

謂癸未之役

謂那里城池難攻拔的上頭

文廷式曰此難攻之城案元槩本卽蔑客惕綿客兒綿客亦別之城也銓案元史太宗紀十一年冬蒙哥率師圍阿蘇蔑怯思城閱三月拔之定宗紀從諸王拔都西征次阿速境攻圍木柵山寨以三十餘人與戰帝及憲宗與焉憲宗紀與諸

王拔都征斡羅思至也烈贊城躬自搏戰破之速不台傳辛丑太宗命諸王拔都等討兀魯思部主也烈班爲其所敗圍禿里思哥城不克遣速不台督戰一戰獲也烈班進攻禿里思哥城三日克之攻馬札兒部至禿納河馬茶城拔之此拔都等西征所攻諸城見於元史者蔑怯思似卽蔑客惕綿爲阿速都城所謂木柵山寨也也烈贊卽也烈班以君名名城西域多有之時斡羅思都務拉的密爾祕史元槧本有客失米兒似卽客亦別城禿里思哥今日都拉斯科在莫斯科南豈卽客兒綿斡馬茶城蓋馬札兒部所都卽今摩爾達唯亞斡勒荅合兒

卽前文十三卷晃塔合兒元史憲宗紀以晃兀兒留守和林



當亦其人

命者別爲頭哨遂敗金兵過居庸關幹歌歹駐軍龍虎臺

此卽太祖南征者別取居庸帝駐龍虎臺之文而錯簡於此攷者別已於太祖乙酉丙戌年間先卒且太宗時燕京久爲元有安得居庸尙有金兵耶

我又生的好可以事神

書金滕曰子仁若考能多材多藝能事鬼神

小廝

漢書陳儀傳廝養卒素隱曰廝音斯廝養馬之賤者正義曰廝謂炊烹供養雜役蘇林曰廝取薪者如淳曰廝賤者也公羊傳曰廝役廋養韋昭曰析薪爲廝炊烹爲養

嶺北

地理志曰嶺北等處行中書省統和甯路總管府始名和林以西有哈刺和林河因以名城太祖十五年定河北諸郡建都於此初立元昌路後改轉運和林使司前後五朝都焉世祖中統元年遷都大興和林置宣慰司都元帥府大德十一年立和林等處行中書省皇慶元年改嶺北等處行中書省改和林路爲和甯路一統志曰喀爾喀古漠北地秦漢時匈奴所居後魏初蠕蠕居之蠕蠕滅而突厥起唐滅突厥回紇及薛延陀並強薛延陀旋滅回紇并有其地貞觀四年來朝以其地爲瀚海燕然金微幽陵龜林盧山六都督府回紇衰五代及宋諸部散居其地羈屬於遼元太祖定諸部建都於

此名和林皇慶改嶺北省順帝依王保保於此後部落號喀爾喀其七部有三汗西曰札薩克圖汗中曰土謝圖汗東曰車臣汗又有善巴者自爲一部曰賽因諾顏部其四部爲旗八十四銓案嶺北省治和林城攷歐陽元俛氏家傳曰和林有三水焉一並城南山東北流曰幹耳汗一經城西北流曰和林河一發西北東流曰忽魯班達彌爾三水距城北三十里合流曰俛輦傑河幹爾汗卽今鄂爾渾河竝城南山東北流知城在水北矣和林河卽今鄂倫河經城之西而北流知城在水東矣達彌爾卽今塔米爾河發源城之西北而東流知城在水南矣俛輦傑卽今色楞格河三水合流當指塔米爾會於鄂爾渾而言而曰俛輦傑者鄂爾渾河下合色楞格

河互受通稱矣又張德輝紀行稱和林東北有一澤泊周廣約六七十里北語謂吾悞竭腦兒自治之南而西分道入和林相去約百餘里則卽今察罕池水道提綱曰朱爾馬台河出額黑鐵木兒山東北流二百餘里瀦爲察罕鄂模廣數十里又東北流百餘里入鄂勒昆河是也元史太宗九年春獵揭揭察合之澤夏作迦堅茶寒殿迦堅茶寒卽揭揭察合音轉蓋殿在澤間因以澤名殿察合茶寒皆察罕對音亦卽斯池矣地理志曰迦堅茶寒殿在和林城北七十餘里而紀行曰相去百餘里者紀行以澤之東北畔言志以澤之西南畔言也一日自治之南而西分道入和林一日在和林城北知城在澤西南矣由此言之元和林城在鄂爾渾河之北鄂倫

河之東塔米爾河之南察罕池之西南今三音諾顏旗東北  
一統志曰和甯路其地在杭愛山東鄂爾渾塔米爾河之間  
是矣和林河北流而經和林城西則水在塔米爾河之南惟  
今察罕鄂倫河當之會典圖說曰塔米爾河經三音諾顏右  
翼中右旗察罕鄂倫河東北流來會鄂倫卽和林對音而東  
北流會塔米爾河正符城西北流之文水道提綱以此河爲  
塔米勒河南源而曰塔米勒河東瀦爲台魯勒倭黑池又東  
有察罕鄂倫河自西北來會疑卽和甯於是屢歧其說曰色  
楞格河東流有哈喇烏倫河自北山東南流注之烏倫疑和  
林轉聲此河之東色楞格河之北卽古和林所云嶺北當指  
賽堪山及庫庫齊老圖諸嶺又曰鄂勒昆河南源又有二一

自鄂爾吉圖都蘭喀喇山北麓東南流曰阿木勒稽烏林塔河亦作烏里雅思他河疑烏林烏里皆和林音轉夫和林河北流而輒舉南流之水以擬之無當也程同文則曰和林在色勒格河南其經和林城西而北流者今哈瑞河也哈瑞河入色勒格河其合流處當在和林北三十里攷張參議紀行曰渾獨刺河西行四驛經一澤泊自泊之南而西分道入和林相去約百餘里泊之正西有小故城亦契丹所築繇城四望地甚平曠可百里外皆有山山之陰多松林瀕水則青楊叢柳而已中卽和林川也繇川之西北行一驛過馬頭山自馬頭山之陰轉而復西南行過忽蘭赤斤有水曰塌米河注之東北塌米河卽塔米爾河是和林在此河之南明甚而謂

在色楞格河南哈瑞河來入之處相距三十里則南去塔米爾河且六七百里必非其地矣和林城在察罕池西南距塔米爾會鄂爾渾處當不止三十里疑契氏傳本作三百里而傳寫字謬也地理志曰和林太祖十五年建都攷元太祖於十四年巳卯西伐至二十年乙酉還至禿剌河黑林舊營征回回七年駕未嘗中回安得十五年有都城之建十五年歲次庚辰據西游記正長春真人出燕京往德興之歲記曰師聞行宮漸西欲待駕回朝謁又曰十月曷刺進表回詔曰雲軒旣發於蓬萊鶴馭可游於天竺云云足證駕未中回也記又曰辛巳四月朔至斡辰大王帳十七日馬首西北二十二日抵陸局河行十有六日河勢繞西北山去又行十日夏至

量日景三尺六七寸漸見大山峭拔又四程西北渡河乃平野其旁山川秀麗水草豐美東西有故城或云契丹所築蓋卽張參議紀行小故城四望平曠卽和林川之地而記無一語及和林者是時實未建都故無和林之目也且太祖所居見於紀者六年帝居怯綠連河十一年春居廬胸河行宮十九年自西域班師二十年春正月還行宮二十二年秋七月崩於薩里川哈老徒之行宮本紀中不見有和林之名安得謂和林爲太祖所建太宗元年秋八月諸王百官大會於怯綠連河曲雕阿闢之地以太祖遺詔卽皇帝位於庫鐵烏阿剌里亦不言和林二年春帝與拖雷獵於斡兒寒河夏避暑塔密爾河始在和林左右嗣是六年春會諸王宴射於斡兒



寒河而七年春遂城和林作萬安宮和林建都實始太宗非由太祖矣和林建都旣在太宗七年之後然則四年壬辰南伐班師曷爲回至嶺北也曰築城建都雖自太宗而行宮之駐則自太祖以來固已久矣祕史曰回至嶺北本紀曰帝還龍庭太祖本紀三年戊辰夏避暑龍庭蓋卽其地耶律鑄雙溪集詩注云龍庭在和林北百里則當在塔米爾河之北西游記曰辛巳六月十三日至長松嶺千雲蔽日多生山陰十四日過山度淺河天極寒十七日宿嶺西時初伏矣朝暮有冰霜已三降師易其名曰大寒嶺山路盤曲西北且百餘里有石河長五十餘里西山連延山行五六日尋登高嶺勢若長虹壁立千仞俯視海子淵深恐人二十八日泊窩里朵之

東皇后請師渡河其水東北流瀾漫沒軸絕流以濟窩里朵  
漢語行宮輿車亭帳望之儼然古之大單于未有此盛此窩  
里朵宜卽太祖戊辰所避暑者長松嶺卽張參議所云山陰  
多松林者今蘇巴勒干諸山也過山渡淺河當卽和林河今  
察罕鄂倫河也山路盤曲百餘里西山連延高嶺千仞當卽  
今庫庫嶺東幹布拉罕北山也石河長五十餘里當卽塔米  
爾河南岸所受哈龍恩格勒山水河行山峽故曰石河俯視  
海子淵深恐人當卽台魯勒倭黑池窩里朵東水東北流當  
卽塔米爾河窩里朵在北岸故皇后請師渡河矣遼史蕭圖  
玉傳開泰元年石烈太師阿里底殺其節度使西奔窩魯朵  
城蓋古所謂龍庭單于城也然則龍庭係匈奴故庭由來舊

矣意太祖克乃蠻之後遂建行宮其地也案改和林曰嶺北  
自皇慶以後祕史云云亦從後名之大漠之北西自阿爾泰  
尾東南一枝縣亘不絕至翁金河北接杭愛山尾又東興安  
嶺暨於克魯倫河之南而肯特一支直至額爾古訥河止所  
謂嶺北者矣

綽兒馬罕征巴黑塔惕種其種歸附了

案元史憲宗紀二年壬子秋命諸王旭烈兀征西域素丹諸  
國三年癸丑夏六月諸王旭烈兀帥師征西域哈里發八哈  
塔等國八年戊子春二月諸王旭烈兀討回回哈里發平之  
禽其王遣使來獻捷郭侃傳壬子從宗王旭烈兀西征西戎  
大國也地方八千里兵至城破合里法算灘降劉郁西使記

曰憲宗皇帝二年壬子命皇弟旭烈西征七年丁巳歲取報達國其王曰合法里有東西城中有大河王師至城下合法里以觥走獲焉其國六百餘年傳四十主至合法里而亡然則綽兒馬罕之役所謂歸附者羈縻而已至旭烈兀西征乃盡取其地萬國史記曰一千二百二十二年蒙古伐波斯王奔印度全土歸蒙古一千二百五十一年蒙古蒙哥封弟大拉几於波斯大拉几征服兩江中之地稱王一千二百二十二年卽元太祖十八年癸未所云王奔印度卽札剌丁逆申河走去事所云全歸蒙古卽歸附綽兒馬罕事一千二百五十一年卽元憲宗三年壬子所云大拉几卽旭烈兀所云征服兩江中地卽破東西城擒哈里法事旭烈兀平西域遂留

鎮波斯故云蒙哥封弟於波斯大拉几征服兩江中之地稱王也既云一千二百二十二年全土歸蒙古又云一千二百五十一年大拉几征服知前祇羈縻也

以其地面與所產之物好

西使記日報達國富庶爲西域冠宮殿皆沈檀烏木壁白黑玉產大珠蘭石瑟瑟金剛鑽之類帶有值千金者人物頗秀於諸國所產馬名脫必察

就令綽兒馬罕等爲探馬赤官留鎮其地

李氏曰地理志西北地有撒麻耳干似卽綽兒馬罕所駐之地其地本名尋斯干者銓案非也綽兒馬罕留鎮自應在波斯境撒麻耳干在鐵門之北去波斯遠鞭長莫及矣

康里乞卜察等三種

乞卜察卽欽察與康里並詳前文九卷據元槧本尙有巴只吉種故云三種元史太宗紀曰九年丁酉春蒙哥征欽察破之擒其酋八赤蠻憲宗紀嘗攻欽察部其酋八赤蠻逃於海島帝聞亟進師至其地適大風刮海水去其淺可渡帝喜曰天開道與我也遂進屠其眾禽八赤蠻命之跪八赤蠻曰我爲一國主豈苟求生且身非馳何以跪人爲乃囚之八赤蠻謂守者曰我鼠入於海與魚何異然終見禽天也今水且迴軍宜早還帝聞之卽班師而水已至後軍有浮渡者地理志太宗甲午年命諸王拔都征西域欽叉阿速斡羅思等國歲乙未亦命憲宗往焉歲丁酉師至覓田吉思海傍欽叉酋八

赤蠻逃避海島中適值大風吹海水去而乾生禽八赤蠻速  
不台傳乙未太宗命諸王拔都西征八赤蠻且曰聞八赤蠻  
有膽勇速不台亦有膽勇可以勝之遂命爲先鋒與八赤蠻  
戰繼又令統大軍遂虜八赤蠻妻子於寬田吉思海八赤蠻  
聞之逃入海中土土哈傳曰欽察去中國三萬餘里夏夜極  
短日暫沒卽出蔑里乞火都奔欽察國主亦納思太祖命將  
討之亦納思老子忽魯速蠻遣使自歸而憲宗受命帥師已  
扣其境忽魯速蠻之子班都察舉族迎降虞集燕帖木兒碑  
曰歲丁酉欽察酋亦訥思之子忽魯速蠻自歸於太宗而憲  
宗受命帥師已及其國忽魯速蠻子班都察舉族來歸銓案  
忽魯速蠻疑卽八赤蠻也

幹魯思

幹魯思元史或作幹羅思或作兀魯思或作阿羅思卽今俄羅斯國也憲宗紀曰嘗攻欽察禽八赤蠻復與諸王拔都征幹羅思部至也烈贊城躬自搏戰破之昔里鈴部傳曰歲乙未定宗憲宗皆以親王與速卜帶征西域明年啟行鈴部亦在中又明年至寬田吉思海鈴部從諸王拔都征幹羅斯至也里晉城大戰七日拔之速不台傳曰辛丑太宗命諸王拔都等討兀魯思部主也烈班爲其所敗圍禿里思哥城不克拔都奏遣速不台督戰速不台選哈必赤軍怯鄰口等五十人赴之一戰獲也烈班進攻禿里思哥城三日克之盡取兀魯思所部而還經哈喇里山攻馬札兒部主怯憐速不台爲



先鋒與諸王拔都吁里兀昔班哈丹五道分進眾曰怯憐軍  
勢盛未可輕進速不台出奇計誘其軍至渾甯河諸王軍於  
上流水淺馬可涉中復有橋下流水深速不台欲結俄潛渡  
繞出敵後未渡諸王先涉河與戰拔都軍爭橋反爲所乘沒  
甲士三十人並亡其麾下將八哈禿旣渡諸王以敵尙眾欲  
要速不台還徐圖之速不台曰王欲歸自歸我不至禿納河  
馬茶城不還也乃馳至馬茶城諸王亦至遂攻拔之而還案  
日本人萬國史記曰俄羅斯古時土番稱斯拉窩尼族薩馬  
爾亞國屬於匈奴西歷五百年間中國東晉時諾弗哥羅基輔二  
邑生齒滋息諾弗哥羅一作諾甫果傑特基輔一作畿耶甫  
俄游彙編曰俄羅斯歐洲之地凡四部西曰波羅的海部西南曰黑海部東南曰裏海部西北曰白海部波羅的海部自此得堡京城外爲省二十八一日諾甫果傑特

大省也西北界比得堡西南界布恩果甫省南界特威爾省  
葉洛思納甫省東界俄羅格達省北界倭羅涅慈省其城名  
同經度四十八度五十六分緯度赤道北五十七度三十一  
分西距比得堡一百七十九里為綠利哥開基之地總記  
楠阿羅義斯志畧稱諾弗哥羅又曰諾戈落黑海部為省十  
有六一曰畿耶甫大省也北界明斯克省南界協爾酸省西  
界倭林斯克省坡多立斯克省東北界坡爾塔禮省東界車  
爾尼果甫省其城名同在涅卜爾河上經度四十八度十一  
分緯度赤道北五十八度二十七分北距比得堡一千一百四  
十一里九百八十八年至一千二百四十年舊都總記稱幾  
富志畧八百六十二年中國唐懿宗諾弗哥羅民相議迎祿  
稱究部

利哥為王祿利哥諾爾曼民族魯西酋長至是建國至其子

亞力漸廓疆土八百八十二年中國唐僖宗取基輔遷都焉

卒伊高立卒子斯非德斯刺夫立分封三子長子耶羅巴為

基輔王次子啞力為得利夫里王庶子烏拉的米爾一作甫刺地馬

為奴維格奴王九百七十二年王卒宋太祖開寶六年耶羅巴即位

於基輔得利夫里王亞利反王親征之亞利敗死奴維格奴  
王烏拉的米爾懼奔法蘭哥以法蘭哥兵侵基輔王將白羅  
得內應城陷王遇害烏拉的米爾卽位於基輔分國封十二  
子由是列國交爭國勢衰替一千一百六十八年宋孝宗乾道五年  
王安得羅遷都烏拉的米爾一作務拉的密爾俄游策編曰  
的密爾大省也北界葉洛斯納甫省科羅斯得羅馬省南界列  
簪省貪博甫省西界特威爾省西南界莫斯科省東界尼  
日里諾甫果傑特省其城名同在克斂齊麻河上經度五十  
八度有五分緯度赤道北五十五度八分西北距比得堡七  
百八十一里俄一千九百零五年以前之舊京總記稱爲拉里  
麻地理備考作瓦拉的迷爾地理全志作拉的迷基輔爲  
波蘭所奪一千二百二十一年元太祖十年壬午蒙古鐵木眞兵始  
來寇一千二百三十七年元太宗十年戊戌大舉來侵陷烏拉的米  
爾執王殺之初諸侯分爭各不相援至是皆降蒙古蒙古仍

立俄故皇子爲王一千三百二十五年元泰定三年俄人始都

墨斯科俄游彙編曰莫斯科窪城在邀開河涅克陵河莫斯克注河合流之處經度五十五度十四分緯度赤道

北五十五度四十五分西北距比得堡六百有西里俄之南

京也二百七十五年前都此凡俄主坐牀加冕必至斯城其

東曰中國城元時所建也皆屬市今裏海部之一省也北界

特威爾省南界喀嚕嚕省圖拉省列督省西界斯馬連司克

省東界接烏一千三百五十八年王狄米得里第二立帝元順

正十年始叛元盡驅蒙古兵一千三百六十三年至正二十年元

師大至陷墨斯科王仍降一千三百九十九年帖木兒郎來

攻墨斯科明太祖洪武二十九年丙子一千四百年又寇墨斯科大掠而

去明建文三年時蒙古衰而俄之裔稍振尼尼諾弗哥羅墨斯

科加森的威爾哥斯德羅諸侯勃興宜萬王墨斯科勢最張

一千四百六十四年

明憲宗成化元年乙酉

敗蒙古人於加森盡復故

地征諸侯伯統轄國內國人上尊號曰加撒猶言皇帝也行  
加冕禮大赦一千四百七十六年始定獨立體裁絕貢於蒙  
古後加森蒙古人與克林部眾連兵寇墨斯科行成而退一  
千五百五十一年明嘉靖三十二年也穆祜孫曰攷俄人沿  
革圖實一千四百五十年乃明景泰元年  
也沈敦和俄國志王以萬第四帥師平加森蒙古人毀其城  
畧作嘉靖十二年加森一作喀山一作喀替俄游集編曰喀替大省也城在喀  
替河上經度六十六度四十七分緯度赤道北五十五度四  
十七分西北距比得堡一千四百三十三里昔為喀替酋都城  
一千五百五十二年奪取其地今屬裏海部北界唯亞特喀  
省南界星比爾司克省陸馬拉省西界尼口里諾甫果傑特  
省東界烏發省其民泥作威即加團俄又曰加森善藝事畜  
馬越三年底定裏海鄰部蒙古之患始除蓋元用兵俄羅斯  
始事於太祖十七年壬午大定於太宗十年戊戌而朮赤之  
裔有俄羅斯地自一千二百二十一年至一千五百五十一

年且三百三十年之久焉

阿速惕

元史太宗紀十一年己亥冬十一月蒙哥率師圍阿蘇蔑怯思城閱三月拔之地理志月祖伯地有阿闐阿思又曰歲丁巳以駙馬刺真之子乞歹鎮守斡羅思阿思歲癸丑括斡羅思阿思戶口阿蘇阿思皆卽阿速音轉定宗紀曰從諸王拔都西征次阿速境攻圍木柵山寨以三十餘人與戰帝及憲宗與焉木柵山寨當卽蔑怯思城據太宗紀爲十一年己亥冬十一月事蓋取阿速在最後也攷迤北十一部落康里欽察阿羅思阿速最著推究元史斡羅思爲今俄羅斯大俄部地欽察在其東北今俄羅斯白海部地康里在其東南今俄

羅斯加匭俄及哈薩克西北部地而阿速在其西南今俄羅斯之南俄地也明史阿速國近天方撒馬爾罕城倚山面川南流入海今俄羅斯南境黑海東北角分一小汊溢成一少海名阿速海端河自北來入之其處有阿速城亦曰阿索富城俄游集編阿速古城在端斯喀邪省西南八十五里阿速海口朔方備乘曰阿索富城一作阿瑣甫在端河入黑海處北臨端河西臨黑海卽古阿速國銓案明史阿速國永樂十七年其酋牙忽沙遣使貢馬及方物天順七年命都指揮白全等使其國意元時亦如幹羅思仍立其故王子者元史杭忽思傳曰阿速氏主阿速國太宗兵至境杭忽思率眾來降賜名拔都兒錫以金符命領其土民云云其爲土耳其所并當在有明中葉以後去今未遠故其城與海灣猶留

舊名端河發源莫斯科南圖拉省境東南流折而西南流入於阿速海阿速城在其東岸明史所謂倚山面川者也

### 荅魯合臣

案元史語解曰達魯花赤頭目也元史紀事本末曰達魯花赤掌印官也元史世祖本紀曰二年詔以蒙古人充各路達魯花赤漢人充總管回回人充同知張廷珍傳曰爲安南達魯花赤謂陳炳光曰天子命我爲安南之長位在汝上蓋元初取回漢各地卽用其土人而以蒙古舊人爲之頭目掌其印務以監督之謂之達魯花赤劉秉忠所謂擇功臣子孫分爲京府州縣監守督責舊官百官志所謂元之設官以蒙古人爲之長而漢人南人貳焉者也



女真

元史本紀曰太祖十年乙亥冬十月金宣撫蒲鮮萬奴據遼

東僭稱天王國號大真改元天泰十一年丙子冬十月蒲鮮

萬奴降以其子帖哥入侍旣而復叛僭稱東夏

西游記曰辛巳十月行次

阿里馬大城西逢東夏使回問來自何時使者曰自七月十二日辭朝帝將兵追算端至印度卽此東夏也

太宗

五年癸巳春二月詔諸王議伐萬奴遂命皇子貴由及諸王

阿赤台將左翼軍討之九月擒萬奴塔思傳曰癸巳秋九月

從定宗於潛邸東征禽咸平宣撫完顏萬奴於遼東萬奴自

乙亥歲率眾保東海至是平之案地理志開元路古肅慎之

地卽金鼻祖之部落也初號女真後改曰女直金末其將蒲

鮮萬奴據遼東元初癸巳歲出師伐之生禽萬奴師至開元

恤品東土悉平蓋萬奴所據乃今盛京及吉林之東境實女  
眞之地也耶律留哥傳曰留哥子辭闇太宗命與撒兒台東  
征高麗東夏蓋初命薩里台定高麗後隨征東夏迨薩里台  
中流矢卒於高麗五年乃改命定宗及按赤台矣

### 高麗

高麗國今朝鮮國在盛京省東南地形如大人伸足著靴南  
北長而東西狹東西南三垂薄海北與盛京以鴨綠江爲界  
西則直隸山東兩省隔渤海相望東卽日本海南尙慶道之  
釜山距日本之對馬島海程半日可至本高句驪新羅百濟  
三國後併爲一其國分八道曰京畿明初高麗王旦自開州  
徙都焉曰江原在國都東曰黃海在國都西曰忠清在國都

西南曰咸鏡在國都東北曰平安在國都西北治平壤城卽箕子所封也曰全羅在國都南舊百濟國曰慶尙在國都東南舊新羅國也一統志曰朝鮮在盛京東一千八百里東西距二千里南北距四千里古營州域外周封箕子於此戰國屬燕秦爲遼東外徼漢初燕人衛滿亡命聚此逐箕子自立都王險傳子及孫右渠武帝元封三年遣楊僕等滅之因分置樂浪臨屯元菟眞番四郡昭帝時省臨屯眞番二郡入元菟漢末有扶餘人高姓者據其地改國號曰高麗又曰高句通典曰高句驪本出於扶餘先祖朱蒙母河伯女爲扶餘王妻日所照遂有孕而生及長名曰朱蒙言善射也國人欲殺之朱蒙棄扶餘東南走渡溡述水至紇升骨城遂居焉號曰句驪以高爲氏東夷傳曰高句驪相傳爲扶餘別種三國魏正始五年幽州刺史毋邱儉討破之尋復據其地

晉咸康八年其王高釗爲慕容皝所破至曾孫璉益强都平壤卽朝鮮國王險城也義熙九年遣使表獻以璉爲都督營州諸軍事高句驪王宋元嘉十二年璉遣使入貢於魏齊永明九年璉卒子雲嗣請命於魏魏冊雲高句驪王梁天監十八年雲卒子安立遣使入貢於梁後亦臣附於東魏高齊齊亡益并有遼東地隋開皇中高麗王元寇遼西遣漢王諒討之元遣使謝罪大業中屢征不克唐武德四年高句驪王建武遣使入貢建武卽元之弟貞觀十六年高麗東部大人泉蓋蘇文弑其王建武立其弟子臧十八年伐高麗明年親征克遼東等數城而還自是數遣軍伐高麗高宗總章元年李勣征高麗拔平壤置安東都護府由此高氏滅儀鳳初新羅據其地

開元以後并於渤海大氏天祐初大氏衰有眇僧躬父者聚眾據開州稱王號大封國遂有高麗故地五代梁龍德二年高麗人王建者起爲海軍統帥襲殺躬父自稱高麗王唐清泰末建引兵破新羅百濟而并其地於是東夷皆附之地益拓建都松岳卽開州也謂之東京而以平壤爲西京晉開運二年建卒子武代立自後子孫遣使貢於宋亦朝於遼金宋嘉定十二年高麗王暉附於蒙古旣而中絕紹定五年蒙古主窩闊台遣兵伐高麗暉請降因置京府縣達魯花赤七十二人監其國端平初悉爲高麗所殺自是四遣兵攻之至元中始服至正之季始貳於元明洪武二年高麗王顥貢方物且請封詔封爲高麗王五年顥爲權相李仁人所弑立其子禍十一年傳位於子昌

二十二年其門下侍中李成桂廢昌而立定昌國君瑤二十五年成桂徙瑤居原州而自立更名旦遣使請改國號帝命仍古號曰朝鮮自是王氏始絕元史高麗傳曰自暉傳其子顯傳其子肅傳其弟高麗受遜位以仁宗皇慶二年四月封高麗王是年其弟高麗立爲世子王氏自建至肅凡二十七王歷四百餘年

曾命札刺亦兒台征進去至是再命也速迭兒爲後援

元史高麗傳太祖十一年契丹人金山元帥六哥等聚九萬餘鼠入其國十二年九月攻拔江東城據之十三年帝遣哈只吉札刺等領兵征之高麗王暉親奉牛酒迎王師遣趙冲其討滅六哥請歲輸貢賦十四年以結和牒文送札刺行營札刺遣使報之十九年著古歟等使其國盜殺之於途自是

連七歲絕信使太宗三年八月命撤禮塔征其國噉請和許之置京府州縣達魯花赤七十二人監之遂班師四年六月噉盡殺朝廷所置達魯花赤以叛八月復遣撤禮塔討之至王京南攻其處仁城中流矢卒別將帖哥以軍還七年命屠古與洪福源領兵征之

哥哥

原注謗拔都卽謗朮赤也朮赤太宗之兄文廷式曰古余克拔都從兄弟也非由朮赤而言銓案文說是

元祕史李注補正卷十五

秀水高寶銓

再說站赤一節我自這裏立起迎著你立的站教巴禿自那裏立起迎著我立的站

案再說者承上文都道是云云而言察阿歹再說也則這裏者察阿歹封地今新疆和闐也蓋和林和闐幹羅思各自其地起站和林之站遞而西南和闐之站遞而東北其相接處當在金山幹羅思之站則遞而東南以接和闐之站其相接處當在裏海原注這裏謂和林是以爲幹歌歹說非也觀結語說將來了句可見

一件各城池內立探馬赤鎮守了



元史兵志曰太祖太宗相繼以有西域中原而屯兵無定向其制殆不可考也世祖之時海宇混一然後命宗王將兵鎮邊徼襟喉之地而河洛山東據天下腹心則以蒙古探馬赤軍列大府以屯之淮江以南地盡南海則名藩列郡又各以漢軍及新附等軍戍焉又曰中統三年三月詔眞定彰德邢州洺磁東平大名平陽太原衛輝懷孟等路各處有舊屬按札兒孛羅笑乃鰓闊闊不花不里合拔都兒等官所管探馬赤軍人案闊闊不花傳曰歲庚寅當是庚辰太祖命太師木華黎伐金分探馬赤爲五部各置將一人闊闊不花爲五部前鋒都元帥歲丙申太宗命五部將分鎮中原闊闊不花鎮益都濟南按察兒鎮平陽太原孛羅鎮眞定肖乃台鎮大名怯烈

台鎮東平丙申爲太宗八年卽祕史各城內立探馬赤鎮守之事矣又石高山傳曰昔太祖皇帝所集按察兒孛羅窟里台孛羅海拔都闊闊不花五部探馬赤軍金亡之後散居牧地每多有人民籍者錢大昕曰五部將之名唯孛羅闊闊不花志傳無異文按察兒卽按札兒肖乃台卽笑乃解怯烈台卽窟里台不里合拔都兒卽孛羅海拔都或有肖乃台而無不里合或有怯烈台而無孛羅海似當以兵志爲正蓋肖乃台本禿伯怯烈氏故又有怯烈台之稱或稱肖乃台或稱怯烈台其實卽一人耳史家疑孛羅海與孛羅爲重出故闊闊不花傳誤分怯烈台以當五人之數今依兵志作不里合則犁然有別矣

大聚會著

原注定宗紀會諸王百官於達蘭達葩之地似卽此事銓案  
達蘭達葩今甯夏府中衛縣地此自在客魯漣河且彼在甲  
辰年紀文繫乙巳年據速不台及郝和尚拔都二列傳則實爲甲辰年事也此自在庚子年也